

10.07.2026

UKA2026/274

Inatsisartut Suleriaasianni § 36 naapertorlugu apeqquteqaat aallaavigalugu oqallinnissamik siunnersuut imaattoq matumuuna saqqummiuppara:

Misissortinnissamut katsorsartinnissamullu utaqqisarnerit pillugit inatsisitigut pituttuisumik piffissaliussamik qulakkeerateqartoqartariaqarneris, aammalu piffissaliussaq nunatsinni eqquutsinneqarsinnaanngippat allami katsorsartinnissamut pisinnaatitaaffik qanoq ilusilernerqartariaqarneris pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Pele Broberg, Naleraq)

Innuttaasoq napparsimaleruni qaammaterpassuarni ukiorpassuarniluunniit misissortinnissaminut katsorsartinnissaminuunniit utaqqisariaqassanngilaq. Sivisuumik utaqqineq nappaatip imaluunniit ajoqusernerup ajorseriarneranik, katsorsaanerup annertunerulerneranik napparsimallunilu sulinnnginnerup sivisunerulerneranik kinguneqarsinnaavoq.

Naleraq isumaqarpoq oqallisigineqartariaqartoq misissortinnissamut katsorsartinnissamullu inatsisitigut pituttuisumik qulakkeerateqartoqassanersaq. Assersuutigalugu innersuunneqarnermit ullut 30-t iluanni misissuisoqarsinnaanersaq, misissuinerullu naammassineqarnerata imaluunniit katsorsaannissamik aalajangiinerup kingorna ullut 30-t iluanni katsorsartinneq aallartinneqarsinnaanersaq.

Piffissaliussat Kalaallit Nunaanni eqquutsinneqarsinnaanngippata, napparsimasoq Kalaallit Nunaanni imaluunniit nunatta avataani katsorsaavimmi allami naleqquttumi piffissaq eqqorlugu misissortinnissamut katsorsartinnissamulluunniit periarfissaqartariaqarneris aamma oqallisigineqartariaqarpoq. Tamanna timikkut tarnikkullu nappaatinut atuussinnaanersaq, kiisalu angalanermut najugaqarnermullu aningaasartuutit qanoq matussuserneqassanersut, oqallisigineqartariaqarpoq.

Oqallinnermi ilaatigut eqqartorusuppagut pinartumik peruluutaasumillu nappaatillit qanoq salliutinneqassanersut, peqqissaanikkut pissuteqartumik piffissaliussamik saneqqutsisinnaaneq, napparsimasut ilisimatinneqartarnerat aammalu aqqissuussap aningaasaqarnikkut piviusunngortinneqarsinnaanera.

Taamaattumik Naleraq apeqquteqaat aallaavigalugu oqallinnermi ammasumik oqallisigerusuppaa innuttaasut piffissaq eqqorlugu misissortinnissamut katsorsartinnissamullu pisinnaatitaaffiat qanoq nukittorsarneqarsinnaanersaq. Oqallinneq inatsimmik aalajangersimasumik allannguinnissamik piumasaqaateqanngilaq.